

16/04/1999

Lawatan PM ditangguh

KOTA BHARU, Khamis - Lawatan kerja Perdana Menteri ke Kelantan yang dijadualkan pada 22 dan 23 April ini, ditunda ke tarikh yang akan ditetapkan kelak.

Menteri Pembangunan Luar Bandar, Datuk Annuar Musa, berkata pihaknya ada menerima surat dari Jabatan Perdana Menteri (JPM) semalam berhubung penangguhan lawatan Datuk Seri Dr Mahathir Mohamad itu.

"JPM perlu menyusun semula siri lawatan Perdana Menteri, termasuk ke beberapa negeri lain sebelum Kelantan dan akan memaklumkan tarikh baru itu tidak lama lagi," katanya di sini, hari ini.

Sebelum ini, Dr Mahathir dijadualkan melakukan lawatan kerja ke Kelantan pada 22 dan 23 April, yang antara lain merangkumi agenda merasmikan sekurang-kurangnya tiga projek besar Kerajaan Persekutuan di negeri ini yang keseluruhannya dianggar bernilai tidak kurang daripada RM125 juta.

Bagaimanapun, beliau dimasukkan ke Institut Jantung Negara (IJN) selama 11 hari mulai 2 April lalu berikutan mengalami jangkitan paru-paru sekembalinya daripada menunaikan haji.

Dr Mahathir dibenarkan keluar dari IJN pada petang Isnin lalu dan dinasihatkan berehat di rumah sehingga pulih sepenuhnya.

Dalam perkembangan lain, Annuar berkata Timbalan Perdana Menteri, Datuk Seri Abdullah Ahmad Badawi akan mengadakan lawatan ke Kelantan pada 1 Mei ini.

(END)